

Godišnji program rada Općinskog suda u Konjicu za period 2022-2024. godine

Konjic, mart 2022.godine

S A D R Ź A J

A. Uvod.....	2
1) Opis nadležnosti suda, sa vizijom i izjavom o misiji. Mandat, misija i vizija.....	3
2) Sažetak analize strateškog okvira.....	4
3) Pregled strateških /trogodišnjih ciljeva za period strateškog planiranja.....	7
4) Sažetak prioriteta za plansku godinu, kao i procjene mogućih problema i rizika u realizaciji.....	10
5) Analiza unutrašnjeg i vanjskog okruženja u kojem radi Sud.....	11
B. Pregled strateških ciljeva suda.....	13
C. Trogodišnji ciljevi i aktivnosti po strateškim ciljevima.....	15
D. Godišnji plan rješavanja sudskih predmeta.....	18

A.Uvod

Na osnovu Uputstva za strateško planiranje i izvještavanje u sudovima u Bosni i Hercegovini, koje je Visoko sudsko i tuzilacko vijeće Bosne i Hercegovine donijelo na sjednici održanoj dana 12.05.2020. godine, člana 31. Zakona o sudovima u Federaciji Bosne i Hercegovine¹ i člana 8.tačka f) Pravilnika o unutrašnjem sudskom poslovanju („Službeni glasnik BiH“, broj: 66/12 i 40/14) predsjednica Općinskog suda u Konjicu donijela je Odluku o potrebi ažuriranja Strateškog plana za period od 2022-2024. godina i izradi Godišnjeg programa rada za 2022. godinu.

Strateškim planiranjem se želi osigurati dosljedna primjena i provedba mandata i nadležnosti Suda, koji su propisani zakonima i drugim relevantnim propisima. Kroz proces strateškog planiranja Sud utvrđuje svoje ciljeve i prioritete, te definiše mjere i aktivnosti za ostvarenje tih ciljeva. Svrha strateškog planiranja je i da se pomogne informisanje budžetskog i normativnog procesa, da se pruže smjernice u pogledu toga na koje oblasti se trebaju fokusirati sudske aktivnosti i čvrsta dokazna osnova za razmatranje i odlučivanje o prioritetima, kao i optimalnoj raspodjeli finansijskih i ljudskih resursa. Kroz strateško planiranje će se osigurati da Sud u najvećoj mjeri bude orijentisan na zadovoljavanje potreba građana i privrednih subjekata, tako što će njihove potrebe uzeti u obzir u okviru procesa strateškog planiranja.

Planiranjem i implementacijom konkretno definisanih aktivnosti Sud će stvoriti snažnu argumentaciju za osiguranje podrške nadležnih ministarstava i bolje razumjevanje potreba Suda.

Strateškim planiranjem će se doprinijeti unapređenju efikasnosti i transparentnosti rada Suda i vraćanju povjerenja u pravosuđe BiH.

Općinski sud u Konjicu osnovan je Zakonom o sudovima u Federaciji Bosne i Hercegovine za područje općina Konjic i Jablanica. Sjedište Suda je u Konjicu. Sud ima odjeljenje izvan sjedišta suda u Prozor-Rami za područje općine Prozor-Rama. Uspostavljanje rada Odjeljenja se očekuje najkasnije do maja 2022. godine. Do konačnog uspostavljanja rada Odjeljenja Suda, u Prozor-Rami se ponedjeljkom i petkom održavaju sudski dani.

¹ („Službene novine FBiH, broj: 38/05, 22/06, 63/10, 72/10, 7/13 i 52/14)

1) Opis nadležnosti Suda, sa vizijom i izjavom o misiji.

Mandat, misija i vizija

1.1. Mandat Suda

Nadležnost Suda propisana je odredbom člana 27. Zakona o sudovima u Federaciji Bosne i Hercegovine.

Sud ima mandat:

1) U krivičnim predmetima:

a) da u prvom stepenu sudi:

- za krivična djela za koja je zakonom propisana kao glavna kazna novčana kazna ili kazna zatvora do 10 godina, ako posebnim zakonom nije određena nadležnost drugog suda;

- za krivična djela za koja je posebnim zakonom određena nadležnost općinskog suda;

- za krivična djela za koja je Sud Bosne i Hercegovine prenio nadležnost na općinski sud;

- u svim krivičnim postupcima protiv maloljetnika;

b) da postupa tokom istrage i nakon podizanja optužnice u skladu sa zakonom;

c) da odlučuje o vanrednim pravnim lijekovima kad je to zakonom predviđeno;

d) da odlučuje o brisanju osude i prestanku mjera sigurnosti i pravnih posljedica osude, na osnovu sudske odluke i

e) da postupa po molbama za pomilovanje u skladu sa zakonom.

2) U građanskim predmetima da u prvom stepenu sudi:

a) u svim građanskim sporovima i

b) u vanparničnom postupku.

3) U prekršajnim predmetima da u prvom stepenu sudi:

a) u svim prekršajnim predmetima i

b) odlučuje o zahtjevima za ponavljanje prekršajnog postupka.

4) U drugim predmetima:

a) da vodi izvršni postupak, ako zakonom nije drugačije određeno;

b) da određuje mjere osiguranja, ako zakonom nije drugačije određeno;

c) da rješava u posebnim postupcima, ako zakonom nije drugačije određeno;

d) da obavlja zemljišno-knjižne poslove u skladu sa zakonom;

e) da pruža pravnu pomoć sudovima u Bosni i Hercegovini i

f) da vrši druge poslove određene zakonom.

1.2. Misija Suda:

Općinski sud u Konjicu kroz blagovremena, nepristrasna i transparentna suđenja, u okviru svoje krivične, građanske, prekršajne i druge zakonom određene nadležnosti, a koju realizira na području općina Konjic, Jablanica i Prozor-Rama, poštujući dignitet stranaka i njihova prava, osigurava efikasno, efektivno, nepristrasno i transparentno rješavanje predmeta.

1.3. Vizija Suda:

Općinski sud u Konjicu kao nezavisan, efikasan i efektivan sud, svojim zakonitim i transparentnim radom doprinosi učvršćivanju vladavine prava, poštivanju prava i sloboda građana i ostvarenju veće sigurnosti i prosperiteta građana.

2) Sažetak analize strateškog okvira

2.1. Ustav i zakoni koji određuju organizaciju, rad i nadležnosti Suda

Ustavom Federacije Bosne i Hercegovine² i Ustavom Hercegovačko-neretvanskog kantona³ određena je obaveza da će sudovi osigurati jednak položaj svim stranama u sudskim postupcima, i da općinski sudovi, koji se mogu osnovati za područje jedne ili više općina, imaju nadležnost u svim građanskim i krivičnim stvarima, osim ako tim ustavima, zakonom Federacije ili zakonom kantona izvorna nadležnost nije dodijeljena nekom drugom sudu.

Kao što je naprijed navedeno Općinski sud u Konjicu osnovan je Zakonom o sudovima u Federaciji Bosne i Hercegovine. Tim Zakonom uređena je nadležnost, finansiranje, pravosudna uprava i druga pitanja od značaja za organizaciju i funkcionisanje Suda.

Zakonom o Visokom sudskom i tužilačkom vijeću Bosne i Hercegovine⁴, određene su, između ostalog, nadležnosti koje ima Visoko sudsko i tužilačko vijeće Bosne i Hercegovine u odnosu na pravosuđe u Bosni i Hercegovini, uvjeti i mandat za vršenje sudijske funkcije, imenovanje sudija i njihova disciplinska odgovornost, privremeno udaljenje sudija od vršenja dužnosti, nespojivost dužnosti sudija sa drugim funkcijama kao i prestanak mandata sudija.

2.2.Strategije, izvještaji i ostali dokumenti

Prilikom pripreme Godišnjeg programa rada Općinskog suda u Konjicu za period od 2021-2023. godine uzete su u obzir sve obaveze i ograničenja koje proizlaze iz strateških dokumenata relevantnih za rad Suda:

Strategija za reformu sektora pravde u BiH za period 2014.-2018. godina (SRSP u BiH)

Strateški plan VSTV BiH za period 2014.-2018.godine

Izveštaj stručnjaka o pitanjima vladavine prava u Bosni i Hercegovini, tzv. Pribeov izveštaj

Sporazum o stabilizaciji i pridruživanju EU

Izveštaj Evropske komisije o napretku Bosne i Hercegovine u procesu pristupanja Evropskoj uniji

Projekt VSTV BiH Unapređenje efikasnosti sudija i odgovornosti sudija i tužilaca u BiH-treća faza

Smjernice za objavljivanje sudskih i tužilačkih odluka na web stranicama pravosudnih institucija

SRSP-e u BiH usaglašen je strateški okvir za sektor pravde u BiH, koji se sastoji od vizije i pet dugoročnih prioriteta. koji su povezani sa jednom od pet strateških oblasti reforme. Prva strateška oblasti reforme odnosi se na pravosuđe. Utvrđeni su dugoročni prioriteti u reformi pravosuđa: *“Dalje jačati i održavati nezavisnost, odgovornost, efikasnost, profesionalnost i usklađenost pravosudnog sistema koji osigurava vladavinu prava u BiH”*. Definisana je vizija, koja opisuje kako

² “Službene novine Federacije BiH“, broj: 1/94, 13/97, 16/02, 22/02, 52/02, 63/03, 9/04, 20/04, 33/04, 71/05, 72/05 i 88/08

³ „Službene novine HNK-a“ broj:5/96

⁴ „Službeni glasnik BiH“, broj: 25/04, 93/05, 15/08

će izgledati sektor pravde u BiH nakon provedenih reformi: *“Efikasan, efektivan i koordiniran sistem pravde u BiH, koji je odgovoran prema svim građanima BiH i potpuno usklađen sa EU standardima i najboljom praksom, garantujući vladavinu prava”*. U cilju ostvarivanja vizije usaglašene za sektor pravde i kako bi se postigao napredak prema ostvarivanju dugoročnih prioriteta, utvrđen je niz strateških programa. Strateški programi koji se odnose na oblast pravosuđa su razvrstani u četiri strateške podoblasti. Druga strateška podoblast odnosi se na: *“Efikasnost i efektivnost pravosudnih institucija u BiH”*. U cilju poboljšanja efikasnosti i efektivnosti pravosudnog Sistema u SRSP-e BiH definisano je deset strateških programa. Četvrta strateška podoblast iz oblasti reforme pravosuđa odnosi se na: *“Otvorenost u radu pravosudnih institucija u BiH”* i za rješavanje pitanja iz te oblasti definisana su dva strateška programa.

VSTV BiH, kao ključna institucija za ispunjavanje reformskih obaveza koje se odnose na učvršćivanje vladavine prava, a koje je Bosna i Hercegovina preuzela u procesu evropskih integracija, u cilju ispunjavanja tih obaveza, izradilo je i na sjednici VSTV BiH održanoj 25.09.2014. godine usvojilo Strateški plan VSTV-a BiH za period 2014.-2018. godine, koji predstavlja prvi hijerarhijski dokument iz strateškog okvira u oblasti pravosuđa. Jedno od ključnih načela na kojima se zasniva funkcionalno pravosuđe, a koji su predviđeni Strateškim planom VSTV-a odnosi se na efikasnost. VSTV BiH je u Strateškom planu, postavilo strateški cilj 3: *„unaprijediti efikasnost sudova“* i s tim u vezi između ostalog je istaknuto da je zadatak VSTV-a BiH da kontinuirano unapređuje rad sudova unapređenjem njihove efikasnosti i približavanjem pravosuđa BiH standardima Evropske komisije za efikasnost pravosuđa (CEPEJ-a). U cilju ostvarenja navedenog strateškog cilja VSTV BiH je izradio više strateških programa, među kojima su slijedeći: *“Smanjiti i broj i starost nerješениh predmeta u sudovima”*; *“Sprečavati nastupanje zastarjelosti predmeta u sudovima”*; *“Osigurati primjenu Pravilnika o vremenskim okvirima za rješavanje predmeta s ciljem povećanja ažurnosti rada sudova”*; *“Unaprijediti sistem alternativnog rješavanja sporova”*; *“Osigurati organizacijske, infrastrukturne i materijalno-tehničke pretpostavke za rad sudova”*; *“Inicirati donošenje propisa kojima se unapređuje efikasnost rada uprave u sudovima”*. U Strateškom planu VSTV-a BiH predviđen je strateški cilj 7: *“Unaprijediti otvorenost i dostupnost informacija o radu pravosudnih institucija u BiH stručnoj i široj javnosti”*, a za ostvarenje tog cilja izrađeno je više strateških programa sa nizom aktivnosti, među kojima su: *“Unaprijediti komunikaciju pravosudnih institucija u BiH sa javnošću; Uspostaviti redovnu praksu informisanja javnosti o ulozi i radu pravosudnih institucija u BiH; Objavljivati detaljnije statističke podatke o rezultatima rada svih pravosudnih institucija u BiH na pravosudnom web portalu”*.

Sporazum o stabilizaciji i pridruživanju (SSP) između BiH i Evropske unije potpisan je 16.06.2008. godine, pa iako su ga u februaru 2011. godine ratifikovale sve članice Evropske unije, nije mogao stupiti na snagu jer BiH nije bila ispunila uvjet poštivanja presude Evropskog suda za ljudska prava (ECtHR) iz 2009. godine u slučaju Sejdić-Finci, kojom presudom se od zemlje zahtjeva da unese izmjene u Ustav kako bi se iz pravila za izbore za Predsjedništvo i državni Dom naroda izbacile diskriminacijske odredbe. Nakon što je Predsjedništvo BiH u januaru 2015. godine pismeno izrazilo opredjeljenja da radi na reformama, koje su potrebne, i nakon što su ga potpisali lideri 14 parlamentarnih stranaka i podržala Parlamentarna skupština, Vijeće je u martu 2015. godine dalo saglasnost za stupanje na snagu SSP-a, koje se desilo 01.06.2015. godine. Stupanjem na snagu SSP-a, Bosna i Hercegovina je otvorila novo poglavlje u svojim odnosima sa EU i potvrdila svoju opredijeljenost

pristupanju EU. U Glavi VII SSP-a pod nazivom *“PRAVDA, SLOBODA I SIGURNOST”* u članu 78. (jačanje institucija i vladavine prava) navodi se slijedeće: *“Strane će u međusobnoj saradnji u oblasti pravosuđa i unutrašnjih poslova pridavati posebnu važnost učvršćivanju vladavine zakona i jačanju institucija na svim nivoima u oblasti uprave općenito, a naročito u provođenju zakona i izvršavanju sudskih presuda. Saradnja će naročito imati za cilj jačanje nezavisnosti sudstva i unapređivanje njegove efikasnosti i institucionalnih kapaciteta, jednakost u postupanju, razvoj odgovarajućih struktura policijskih, carinskih i drugih organa za provođenje zakona, uz pružanje adekvatne obuke i borbe protiv korupcije i organiziranog kriminala”*.

U Mišljenju Evropske komisije o zahtjevu BiH za članstvo u Evropskoj uniji od 29.05.2019. godine, u dijelu koji se odnosi na pravosuđe i osnovna prava između ostalog se navodi da je ustavni i zakonski okvir koji uređuje pravosuđe u BiH nepotpun i da ne pruža dovoljne garancije nezavisnosti, odgovornosti i efikasnosti pravosuđa i da su potrebni dalji naponi na poboljšanju funkcionisanja pravosuđa, posebno u pogledu nepristrasnosti i efikasnosti, te da u cilju jačanja garancija nezavisnosti sudstva, između ostalog i od svih oblika politizacije i pritisaka, VSTV BiH i sudski sistem na državnom nivou trebaju imati eksplicitan ustavni status. Naglašeno je da Zakon o VSTV-u BiH treba revidirati, kako bi se bolje regulisala imenovanja i ocjenjivanje rada članova pravosuđa i disciplinski postupci protiv njih, te osigurali odgovarajući pravni lijekovi protiv pravosnažnih odluka VSTV-a BiH. U dokumentu se takođe navodi da je potrebna ravnomjernija raspodjela kadrovskih resursa u pravosuđu i bolja transparentnost pravosuđa kroz bolju interakciju sa medijima i društvom. U dijelu gdje se vrši analiza kvaliteta pravosudnog sistema navodi se da on nije dovoljno transparentan. Naglašava se da u većini slučajeva, ministarstva finansija ili pravde mogu smanjiti budžet pravosudnih institucija bez ikakvog obrazloženja, i da to utiče na efikasnost rada pravosuđa. Kada se govori o obuci sudija ističe se da je potrebna bolje usmjerena obuka kako bi se osigurala profesionalnost i efikasnost, i da obuka treba da obuhvati praktične vještine u obavljanju sudijskih poslova, sudsku etiku i komunikaciju sa strankama u sudskim postupcima i medijima, te da se predsjednici sudova trebaju više uključiti u identifikaciju potreba za edukacijom svojih zaposlenih. Što se tiče efikasnosti rada sudova navodi se da je primjena planova za smanjenje broja najstarijih predmeta dovela do progresivnog smanjenja broja neriješenih predmeta i njihovog trajanja, ali da i dalje broj neriješenih predmeta koji se odnose na neplaćeni račun za komunalne usluge ozbiljno ugrožava efikasnost pravosuđa, te da bi te predmete vezane za komunalne usluge i sporove male vrijednosti potrebno značajno smanjiti hitnim izmjenama zakona o izvršnom postupku na svim nivoima kako bi naplata bila efikasnija, posebno u Federaciji BiH, te pronalaženjem odgovarajućeg modela za izmještanje tih predmeta iz sudova na druge organe, bilo javne ili privatne. Konstatuje se da bi uspostavljanje registara dužnika na svim nivoima i naloga za plaćanje umjesto vjerodostojne isprave trebalo da bude od pomoći u tom pogledu i da ubrza postupak. Takođe se konstatuje da treba unaprijediti, promovisati i šire koristiti alternativne metode rješavanja sporova, posebno sudsku nagodbu i medijaciju.

U Izvještaju stručnjaka o pitanjima vladavine prava u Bosni i Hercegovini, tzv. Pribeovom izvještaju, se između ostalog govori o tome da je vladavina prava ključna za proces proširenja EU i da su u BiH, u interesu države i njenih građana, potrebne sistemske reforme u važnim segmentima vladavine prava, kao što je pravosuđe. Ističe se da su parnični postupci mukotrpni, složeni i formalistički, i da

predugo traju, da je sistem izvršenja sudskih presuda zastario, da je potrebno hitno usvojiti zakone i provedbene mjere kojim će se riješiti predugo trajanje postupaka. Takođe se ističe da se mora olakšati upotreba alternativnih metoda rješavanja sporova u građanskim stvarima i djelotvorno izvršenje postignutih dogovora. Naglašava se da dugo očekivana primjena zakonskog okvira o elektronskoj komunikaciji mora odmah početi i u sudskim postupcima. U Izvještaju se navodi da sudije moraju efikasno upravljati sudskim postupcima i osigurati puno poštivanje procesne discipline, jer da slabo upravljanje ročištem i blagost sudija u osiguranju procesne discipline dodatno doprinose dugotrajnosti postupaka. Naglašava se kako se procesne odredbe ne primjenjuju strogo, da se ročišta neredovno zakazuju tokom dužeg vremenskog perioda, a rokovi produžavaju često bez ozbiljnog objašnjenja, te da je neophodna čvrsta posvećenost i osnaženje sudija da bi se olakšao rad pravosuđa u razumnom roku. Kaže se da bi sudovi trebali u potpunosti koristiti pravosudnu informatičku infrastrukturu za povećanje efikasnosti posebno u vanparničnim predmetima, te da se moraju hitno usvojiti i provesti zakoni koji će omogućiti elektronsko podnošenje predstavlki. U Izvještaju se navodi da nedostatak koordinacije i saradnje među učesnicima u krivičnopravnom sistemu (tj. tijelima za provođenje zakona, tužilaštvima i nadležnim sudovima na svim nivoima u BiH) neizbježno stvara uvjete ozbiljnu nefunkcionalnost i neefikasnost. Dalje se ističe da kao i u parničnim postupcima, krivična suđenja su preduga, složena i neefikasna, da su sudije preblage u upravljanju suđenjima, da dozvoljavaju duge vremenske periode između ročišta i česte rutinske odgode uz malo ili nimalo opravdanja i da se suđenja trebaju organizovati po principu da kada počnu, moraju biti zakazivana uzastopno svakim radnim danom do kraja postupka, osim kada postoji valjan razlog da se odstupi od ovog principa, te da je potrebno izmijeniti zakone o krivičnom postupku kako bi se navedeno učinilo obaveznim. U vezi sa transparentnošću sudskih postupaka u Izvještaju se navodi da je nedovoljno razvijena kultura transparentnosti i odgovornosti i da sudije ne postupaju uvijek sa dovoljnom dozom transparentnosti, da presude nisu dovoljno obrazložene i da sudski postupci, kao i same pravosudne institucije, nisu dovoljno otvoreni za javnost i medije.

VSTV BiH Projekat Unapređenja efikasnosti sudova i odgovornosti sudija i tužilaca u BiH-treća faza (u daljnjem tekstu: ICEA III), koji traje od oktobra 2020- oktobra 2023. godine, realizuje se uz partnerstvo sa Sudskom administracijom Švedske, sudovima u BiH, te sestrinskim sudovima i ostalim kolegama iz Švedske. Glavni cilj Projekta je unapređenje efikasnosti, kvalitete, nezavisnosti i transparentnosti pravosuđa koje vodi ka kreiranju pravosudnog sistema u službi građana. Jedna od aktivnosti Projekta je „Reorganizacija poslovnih procesa u sudovima“, u koju aktivnost je uključen i ovaj sud. Glavni cilj te aktivnosti je poboljšanje interne organizacije u sudovima u BiH, kako bi se postigao njihov učinkovit, brz i kvalitetan rad, uključujući kraće trajanje postupaka, smanjenje zaostataka i smanjenje sudskih troškova, te rasterećenje sudija i veća motiviranost zaposlenih u sudu.

3) Pregled strateških i trogodišnjih ciljeva za period strateškog planiranja

Strateški cilj 1: Unapređenje efikasnosti i efektivnosti

Strateški cilj je preuzet iz SRSP BiH i sudu služi kao osnov za izradu trogodišnjih ciljeva.

Trogodišnji cilj 1.1

Povećanje koeficijenta protoka parničnih, vanparničnih, izvršnih predmeta i prekršajnih predmeta.

S obzirom na činjenicu da je u 2021. godini došlo do značajnog smanjenja protoka prekršajnih predmeta ovaj trogodišnji cilj je dopunjen tako da je planirano da se poveća koeficijent protoka prekršajnih predmeta. Naime u 2018. godini protok prekršajnih predmeta je iznosio 128%, 2019. godini 116%, 2020. godini 91%, a u 2021. godini protok prekršajnih predmeta je iznosio 83%. Do pada broja riješenih prekršajnih predmeta u 2021. godini je došlo jer se sudija, koji je radio prekršajne predmete u toku 2021. godine nalazio na bolovanju 174 dana, zbog posljedica koje je korona virus ostavio na njegovo zdravlje. Povećanje broja riješenih prekršajnih predmeta, odnosno koeficijenta protoka tih predmeta će se u narednom planskom periodu postići kroz drugačiju dodjelu u rad tih predmeta sudijama, što je već učinjeno Odlukom o automatskoj dodjeli predmeta u CMS-u broj:56 0 Su 072570 22 Su od 16.02.2022.godine.

Trogodišnji cilj 1.2.

Redovna edukacija iz parnične, vanparnične, izvršne, krivične i prekršajne oblasti, kao i drugih relevantnih tema

Ovaj strateški cilj je djelimično dopunjen tako što je planirano da će se redovna edukacija vršiti i iz krivične i prekršajne oblasti, kao i da će se na obuku prijaviti i pripravnici volonteri za određene teme. Radi ostvarenja postavljenog cilja preko Centra za edukaciju sudija i tužilaca u FBiH, a u skladu sa Programom početne obuke i stručnog usavršavanja sudija i stručnih saradnika u FBiH, predsjednica Suda, sudije, stručni saradnici i pripravnici volonteri će učestvovati na seminarima, radionicama i drugim oblicima edukacije na teme iz parnične, vanparnične, izvršne, krivične i prekršajne oblasti, kao i na druge teme iz oblasti, koje su relevantne za rad Suda, a shodno tome koja vrsta predmeta im se dodjeljuje u rad. Takođe će se redovno vršiti i edukacija sudskih izvršilaca, kako bi se unaprijedio njihov rad. Zaposlenici u Zemljišnoknjižnom odjeljenju ovoga suda će pohađati obuke koje organizira Federalna uprava za geodetske i imovinskoppravne poslove.

Trogodišnji cilj 1.3.

Osigurati adekvatan prostor za rad Suda i Odjeljenja suda u Prozor-Rami.

Općinski sud u Konjicu nije riješio pitanje adekvatnog prostora za rad Suda, tako da će se i u narednom planskom periodu nastaviti raditi na realizaciji ovog trogodišnjeg cilja.

Ovaj trogodišnji cilj je djelimično realizovan, Naime, svojom Odlukom broj:01-1-02-1560/21 od 16.06.2021. godine, Vlada Hercegovačko-neretvanskog kantona je iz tekućih rezervi Budžeta HNK-a za 2021. godinu odobrila Općinskom sudu u Konjicu finansijska sredstva u iznosu 116.876,43 KM za nabavku kancelarijskog namještaja i informatičke opreme za potrebe Odjeljenja Suda u Prozor-Rami. Ovaj sud je proveo postupak javne nabavke i nabavio kancelarijski namještaj i informatičku opremu za Odjeljenje Suda u Prozor-Rami. Sud je u toku 2021. godine raspisao javni oglas i izvršio izbor zaposlenika koji će raditi u Odjeljenju suda u Prozor-Rami. U toku je adaptacija drugog sprata zgrade Vatrogasnog doma u Prozor Rami , gdje je planirano da se smjesti Odjeljenje ovoga suda za područje općine Prozor-Rama i očekuje se da će do kraja marta 2022. godine biti završena, pa bi prema sadašnjoj procjeni Odjeljenje Suda u Prozor-Rami trebalo početi sa radom početkom maja mjeseca ove godine.

Realizacijom ovog postavljenog strateškog cilja Suda, kroz trogodišnje ciljeve, Sud će doprinijeti ostvarenju strateškog cilja 3 „*unaprijediti efikasnost sudova*“ predviđenog u Strateškom planu VSTV-a BiH i vizije iz SRSP-e BiH „*Efikasan, efektivan i koordiniran sistem pravde u BiH, koji je odgovoran prema svim građanima BiH i potpuno usklađen sa EU standardima i najboljom praksom, garantujući vladavinu prava*“, te ispoštovati preporuke iz „Priebeovog izvještaja“ ,kao i mišljenja i smjernice iz drugih naprijed navedenih dokumenata strateškog okvira, koje se odnose na efikasnost rada sudova, a samim tim i jačanju pravosudnog sistema u cjelini i vraćanju povjerenja građana u pravosuđe.

Sredstva za ostvarenje navedenog strateškog cilja su planirana u Dokumentu okvirnog budžeta (DOB-a) za period 2021.-2023. godine, kao i DOB-a za period od 2022.-2024. godina u Programu 1, pod nazivom :“ *Zakonito postupanje, upravljanje i suđenje po sudskim predmetima u razumnom roku po svim referatima i vrstama predmeta*“.

Trogodišnji cilj 1.4.

Reorganizacija poslovnih procesa u Sudu

Ovaj trogodišnji cilj je djelimično realiziran jer je završena prva faza projektne aktivnosti „unapređenje poslovnih procesa u sudovima, kroz reorganizaciju rada sudova i ljudskih resursa u sudovima“, iz „Projekta ICEA III, koji je VSTV BiH usvojio na sjednici održanoj 03. i 04. juna 2020. godine, koja je predviđala uvođenje novog modela rada u Sudu, a u toku je realizacija druge faze gdje je planirano da timovi počnu raditi po listi delegiranih zadataka, da se vrši koordinacija u timu i između timova, te da se zaposlenici informišu o postignutim rezultatima, kao i treća faza u kojoj je planirano da se produži rad koji podrazumjeva delegiranje zadataka sudskim pripravniciima/volonterima, uz uključivanje po mogućnosti svih uposlenika, te da se razviju metode i strukture za praćenje primjene i razvoj novog modela rada.

U planskom periodu, nakon što se izvrši izmjena određenih propisa koji definišu rad sudskih pripravnika/volontera u sudu, Sud planira da u potpunosti implementira novi model rada u Sudu . Uz saglasnost Ministarstva pravosuđa uprave i lokalne samouprave HNK-a planira se izmjena Pravilnika o unutrašnjoj organizaciji i sistematizaciji radnih mjesta u pravcu povećanja broja sudskih pripravnika/volontera sa sadašnjih 5 na 8 sudskih pripravnika/volontera shodno broju sudija u Sudu, s tim da je u Pravilniku već sistematizovano i jedno mjesto sudskog

pripravnika, za koju poziciju, zbog nedostatka finansijskih sredstava, unazad više godina nije raspisivan javni konkurs.

Ostvarenjem ovog strateškog cilja poboljšat će se efikasnost rada Suda, njegova produktivnost, omogućiti učinkovitiji, brži i kvalitetniji rad Suda, kraće trajanje postupaka, smanjenje sudskih troškova, rasterećenje sudija od administrativnih poslova, bolja upotreba sposobnosti sudskog osoblja, povećati timski rad u Sudu, unaprijediti raspodjela rada, doprinijet će se profesionalnom i ličnom razvoju sudskog osoblja, veće zadovoljstvo poslom i motivacija osoblja u Sudu, kao i veće zadovoljstvo građana radom Suda.

Realizacijom navedenog strateškog cilja Suda, kroz aktivnosti predviđene trogodišnjim ciljevima Sud će doprinijeti ostvarenju strateškog cilja 3 „unaprijediti efikasnost sudova“ predviđenog u Strateškom planu VSTV-a BiH i ispoštovati preporuke, mišljenja i smjernice iz naprijed navedenih dokumenata strateškog okvira, koje se odnose na efikasnost rada sudova i time jačanju pravosudnog sistema u cjelini i vraćanju povjerenja građana u pravosuđe.

Finansijska sredstva za ostvarenje ovoga cilja planirana su u DOB-u za period 2021-2023.godine i u okviru finansijskih sredstava namjenjenih za realizaciju Projekta tekstu ICEA III.

Strateški cilj 2: Unapređenje transparentnosti rada Suda

U narednom planskom periodu nastaviti će se djelovati na realizaciji ovog strateškog cilja, kroz ostvarenje trogodišnjih ciljeva 2.1 i 2.2 „**Jačanje raznih kanala komunikacije**“ i „**Unapređenje načina objave i količine objavljenog sadržaja na web stranici Suda**“, koji ciljevi su postavljeni u „Godišnjem programu rada Općinskog suda u Konjicu za period 2021-2023. godine, sa kojim se saglasila Stalna komisija VSTV BiH za efikasnost i kvalitet sudova na sastanku održanom dana 21.06.2021.godine

4) Sažetak prioriteta za plansku godinu, kao i procjena mogućih problema i rizika u realizaciji

Proritet u radu Općinskog suda u Konjicu u 2022. godini je povećanje koeficijena protoka prekršajnih predmeta, jer je u 2021. godini, zbog bolovanja predsjednika prekršajnog odjeljenja koje je trajalo 174 dana, došlo do značajnog smanjenja protoka tih predmeta, u odnosu na raniji period kada je protok te vrste predmeta bio znatno veći. Povećanje efikasnosti i transparentnosti rada u obavljanju poslova i zadataka iz nadležnosti Suda, koji proističu iz Zakona o sudovima FBiH i drugih pozitivnih propisa, cilj je kojem će se težiti u 2022. godini. Sud takođe planira da u nastavi reorganizaciju poslovnih procesa u Sudu, odnosno da u potpunosti implementira projektnu aktivnost „unapređenje poslovnih procesa u sudovima, kroz reorganizaciju rada sudova i ljudskih resursa u sudovima“, iz Projekta ICEA III koji projektni zadatak je VSTV BiH usvojio na sjednici održanoj 03. i 04. juna 2020. godine i ovaj sud identificirao kao jedan od pilot sudova u kojima će se provesti ta aktivnost. Taj strateški cilj će se realizirati uz posredovanje VSTV-a BiH i saradnju sa okružnim sudom iz Ostersunds iz Švedske, kao i drugim pilot sudovima u BiH.

Kao veoma važan zadatak u 2022. godini bit će poduzimanje svih potrebnih radnji i ostvarivanje kontakata sa nadležnim organima u cilju obezbjeđenja adekvatnog prostora za rad Suda. Najveći mogući problem i rizik koji može onemogućiti ostvarenje planiranih ciljeva je pandemija korona virusa koja, bez prekida, traje od marta mjeseca 2020. godine, ali se realno može očekivati da će se u dogledno vrijeme provesti masovna vakcinacija stanovništva u BiH i da će doći do stavljanja pod kontrolu korona virusa, čime će se stvoriti uvjeti za proglašenje prestanka pandemije i normalno funkcionisanje Suda. Sporo rješavanje ostavinskih predmeta od strane notara, kao povjerenika suda, te određena ponašanja stranaka i njihovih punomoćnika takođe mogu predstavljati problem u realizaciji strateškog cilja koji se odnosi na unapređenje efikasnosti rada Suda.

Problemi oko obezbjeđenja dovoljnih finansijskih sredstava za stvaranje adekvatnog poslovnog prostora za rad Suda može onemogućiti ostvarenje tog cilja.

Ostvarenjem svojih strateških ciljeva Općinski sud u Konjicu će doprinijeti ostvarenju strateških ciljeva iz Strateškog plana VSTV-a za period od 2014-2018. godine i vizije iz SRSP-e u BiH, te ispoštovati preporuke iz Izvještaja stručnjaka o pitanjima vladavine prava u Bosni i Hercegovini, tzv. Priebeovog izvještaja, kao i preporuka iz drugih dokumenata strateškog okvira.

5) Analiza unutrašnjeg i vanjskog okruženja u kojem radi Sud

Kada se analizira protok predmeta u Općinskom sudu u Konjicu u periodu od 01.01.2015. do 31.12.2021.godine može se konstatovati da je koeficijent protoka predmeta do 2020. godine konstantno bio veći od 100% , što znači da je Sud svake godine uspio riješiti ukupan priliv predmeta, i da se kretao ka ostvarenju svog prvog strateškog cilja da bude efikasan sud i da postane ažuran sud na svim referatima. U 2020. godini koeficijent protoka predmeta iznosio je 95,31%, dok je na dan 31.12.2021. godine koeficijent protoka predmeta bio nešto veći i iznosio je 99,00 %. Glavni uzrok zbog kojeg je koeficijent protoka predmeta u 2020. i 2021. godini bio manji u odnosu na prethodne godine je epidemiološka situacija izazvana pandemijom korona virusa, koja traje od marta mjeseca 2020. godine, a nužne mjere koje su je pratile i još uvijek prate, ograničile su i usporile rad ovoga suda, kao i svih drugih pravosudnih organa. S obzirom na činjenicu da je bilo neophodno poštovati upute, VSTV BiH, naredbe i odluke nadležnih Kriznih štabova, u cilju zaštite zdravlja nosilaca pravosudnih funkcija, zaposlenika i stranaka (građana), dolazilo je i još uvijek dolazi do odlaganje suđenja, zakazivanja manjeg broja rasprava, odlaganja rasprava na zahtjev punomoćnika stranaka u postupku ili iz drugih objektivnih razloga, mada je u 2021. godini došlo do povećanja koeficijenta protoka predmeta jer je zbog smanjenja broja zaraženih korona virusom došlo do liberalizacije epidemioloških mjera, što je doprinijelo i normalnijem radu Suda.

Sud je u 2021. godini realizirao svoj trogodišnji plan da poveća koeficijent protoka parničnih, vanparničnih i izvršnih predmeta za 20%, ali s obzirom na činjenicu da je došlo do smanjenog koeficijenta protoka prekršajnih predmeta u narednom periodu se planira povećanje broja riješenih predmeta te vrste. Pored toga Sud planira da u 2022. godini, kao i u cjelokupnom planskom periodu, poveća transparentnost svoga rada, u skladu sa definisanim strateškim ciljevima Suda.

Izveštaji koji postoje u CMS-u i SIPO-u predstavljaju dobar alat pomoću kojeg je moguće pratiti rad Suda, sudija, stručnih saradnika i ostalih zaposlenika, kao i planirati određene aktivnosti i vršiti potrebne analize.

VSTV BiH je na sjednici održanoj 03. i 04. juna 2020. godine usvojio projektnu aktivnost „unapređenje poslovnih procesa u sudovima, kroz reorganizaciju rada sudova i ljudskih resursa u sudovima“, iz „Projekta ICEA III“ i ovaj sud identificirao kao jedan od pilot sudova u kojima će se provesti ta aktivnost. Ta aktivnost će se provesti uz posredovanje projektnog tima VSTV-a BiH i saradnju sa timom iz okružnog suda u Ostersundu iz Švedske, kao i saradnju sa drugim pilot sudovima iz BiH, u kojima se provodi ista aktivnost. Realizacijom navedene aktivnosti doprinijet će se efikasnijem radu Suda.

Sud ima dva sudska izvršioca, sa dugogodišnjim iskustvom u oblasti izvršnog postupka i dobro su obučeni za svoj rad, ali sistemski problemi koji postoje u izvršnom postupku negativno se odražavaju na rezultate njihovog rada. Iako je VSTV BiH davno prepoznao probleme koji postoje u vezi sa izvršnim postupkom i u tom pravcu poduzeo određene aktivnosti praktičnog karaktera, kroz razvoj odgovarajućih softverskih rješenja, te formirao Radnu grupu za unapređenje izvršnog postupka i reviziju zakonâ o izvršnom postupku u BiH, još uvijek nije došlo do reforme izvršnog postupka, što svakako negativno utiče na rad i ovoga suda.

Zgrada Općinskog suda u Konjicu izgrađena je 1947. godine i njen kapacitet nije dovoljan za smještaj svih poslovnih prostorija Suda, tako da je Zemljišnoknjižno odjeljenje izmješteno u drugu zgradu, kao i kancelarije sudskih izvršilaca. Pored toga i u samoj zgradi Suda nedostaje prostora, radi čega sudije koje rade na krivičnom referatu nemaju svoje kancelarije i poslove obavljaju u krivičnim sudnicama, dok stručne saradnice rade u zajedničkoj kancelariji, a jedan daktilograf koji je raspoređen da radi sa stručnom saradnicom zbog nedostatka prostora svoje radne zadatke izvršava u prijemnoj kancelariji Suda. Šef računovodstva svoj posao obavlja u vrlo skućenom prostoru površine 4m². Viši samostalni referent za informacijske i komunikacijske tehnologije (CMS administrator), zbog nedostatka radnog prostora, svoje poslove obavlja u kancelariji u kojoj je smješten i arhivar ovog suda. Svoj radni prostor nemaju ni viši referent-kurir-vozač, kao ni spremačice radnog prostora. Sud nema posebnu prostoriju za odlaganje predmeta po kojima je rad u toku, tako da se isti odlažu u pisarnici i prijemnoj kancelariji Suda. Aktivnosti na iznalaženju rješenja za smještaj Suda počele su još 2016. godine u saradnji sa Ministarstvom pravosuđa uprave i lokalne samouprave HNK-a i VSTV-om BiH, a na zahtjev Suda u Budžetu su od 2016. godine odobravana finansijska sredstva u iznosu od 300.000,00 KM, koja nisu iskorištena, jer nije pronađeno rješenje za smještaja zgrade Suda. U narednom periodu neophodno je intenzivirati aktivnosti u pravcu iznalaženja rješenja za trajni smještaj zgrade Suda.

Iako je shodno Ustavu FBiH i Zakonu o sudovima u FBiH sudska vlast, odnosno sudovi samostalni i nezavisni od izvršne i zakonodavne vlasti, to u stvarnosti nije tako. S obzirom na činjenicu da se Sud finansira iz budžeta kantona, iz tih razloga je prinuđen da, putem Ministarstva pravosuđa uprave i lokalne samouprave HNK-a od Vlade HNK-a traži saglasnost za objavu oglasa za upražnjena radna mjesta namještenika, koji su zbog odlaska u penziju ili iz drugih razloga prestali da rade u Sudu, kao i za upražnjena radna mjesta državnih službenika za koje proceduru popunjavanja tih radnih mjesta provodi Agencija za državnu službu FBiH, jer u protivnom nebi bila odobrena finansijska sredstva za plate tih uposlenika. S druge strane, kada konačno i dobijemo dugo čekanu saglasnost Vlade HNK-a, Agencija za državnu službu FBiH jako sporo provodi konkursnu proceduru. problem za Sud predstavlja i činjenica

da, nakon što u Sudu ostane upražnjena pozicija sudije, dugo traje procedura imenovanja novog sudije od strane VSTV-a BiH. Određena ponašanja punomoćnika stranaka i branilaca optuženih, zbog kojih se odgađaju ročišta takođe utiče na rad suda. Sporo rješavanje ostavinskih predmeta od strane notara, kao povjerenika suda, usporava rad Suda. Sve naprijed navedene činjenice i okolnosti negativno se odražavaju na efikasnost rada Suda.

SNAGE	SLABOSTI
redovna finansijska sredstva budžeta stručne sudije, sa dugogodišnjim iskustvom u rješavanju predmeta dobro obučeni sudski izvršioc i sa dugogodišnjim iskustvom u svom radu	pandemija corona virusa nedostatak radnog prostora često odlaganje ročišta u predmetima
PRILIKE	PRIJETNJE
Dostupnost raznih vrsta izvještaja u CMS-u i SIPO-u Reorganizacija poslovnih procesa u Sudu	Loša zakonska regulativa u oblasti izvršnog postupka i spore promjene u toj oblasti Neujednačena sudska praksa

B. Pregled strateških ciljeva Suda

Naziv strateškog cilja	Izvor	Program u DOB-u	Partneri
Unapređenje efikasnosti i efektivnosti	-Strateški plan Visokog sudskog i tužilačkog vijeća Bosne i Hercegovine za period od 2014-2018. godine Strateški cilj 3: „<i>unaprijediti efikasnost sudova</i>“ Strategija za reformu sektora pravde u BiH za period od 2014.-2018.godine Vizija: „<i>Efikan, efektiv i koordiniran sistem pravde u BiH, koji je odgovoran prema svim građanima BiH i potpuno usklađen sa EU standardima i najboljom praksom, garantujući vladavinu prava</i>“, -Izveštaj stručnjaka o pitanjima vladavine prava u Bosni i Hercegovini, tzv. Pribeov izveštaj	<u>Program 1</u> Zakonito postupanje, upravljanje i suđenje po sudskim predmetima u razumnom roku po svim referatima i vrstama predmeta.	VSTV BiH Ministarstvo pravosuđa uprave i lokalne samouprave Hercegovačko-neretvanskog kantona
Pokazatelji za krajnje rezultate	Očekivani rezultati po godinama		
	2022	2023	2024

Broj riješenih parničnih predmeta	554	609	650
Broj riješenih vanparničnih predmeta	750	825	900
Broj riješenih izvršnih predmeta	816	896	950
Broj riješenih prekršajnih predmeta	510	570	630
Broj održanih obuka za predsjednicu Suda, sudije, stručne saradnike, sudske izvršioce, sekretara suda i pripravnike-volontere	46	48	50
Osiguran adekvatan prostor za rad Odjeljenja suda u Prozor-Rami	100%	-	-
Broj uposlenih volontera/pripravnika u Sudu	5	6	8
Broj formiranih timova u sudu	5	6	8

Naziv strateškog Cilja 2	Izvor	Program u DOB-u	Partneri
Unapređenje transparentnosti rada Suda	-Strateški plan Visokog sudskog i tužilačkog vijeća Bosne i Hercegovine za period od 2014-2018. godine- Strateški cilj 7: „Unaprijediti otvorenost i dostupnost informacija o radu pravosudnih institucija u BiH stručnoj i široj javnosti“	<u>Program 1</u> Zakonito postupanje, upravljanje i suđenje po sudskim predmetima u razumnom roku po svim referatima i vrstama predmeta.	-VSTV BiH -Ministarstvo pravosuđa uprave i lokalne samouprave Hercegovačko-neretvanskog kantona -Mediji
Pokazatelji za krajnje rezultate	Očekivani rezultati po godinama		
	2022	2023	2024
Broj objava na web stranici suda povećan za 10 objava svake godine	10	20	30
Procenat odgovora na zahtjev za pristup informacijama.	100%	100%	100%

C.Trogodišnji ciljevi i aktivnosti po strateškim ciljevima

Strateški cilj 1	<u>Unapređenje efikasnosti i efektivnosti</u>		
Trogodišnji cilj 1.1.	<i>Povećanje koeficijenta protoka parničnih, vanparničnih, izvršnih i prekršajnih predmeta</i>		
Pokazatelji za izlazne rezultate	Očekivani rezultati po godinama		
	2022 (n)	2023 (n+1)	2024 (n+2)
Broj riješenih parničnih predmeta	554	609	650
Broj riješenih vanparničnih predmeta	750	825	900

Broj riješenih izvršnih predmeta		816	896	950
Broj riješenih prekršajnih predmeta		510	570	630
Redni broj	Naziv aktivnosti za 2022. godinu	Rok izvršenja (po kvartalima u 2022. godini)	Nosilac (najmanji organizacioni dio)	
1.1.1.	Odluka o automatskoj dodjeli predmeta u CMS-u za 2022. godinu	I	Predsjednica Suda	
1.1.2.	Izrada Plana rješavanja parničnih, vanparničnih, izvršnih i prekršajnih predmeta	I	Građansko i prekršajno odjeljenje	
1.1.3.	Održavanje redovnih sastanaka stručnog kolegija Suda i odjeljenja Suda. Analiza razloga dužine trajanja neriješenih predmeta . Analiza razloga odgađanja i odlaganja ročišta. Praćenje koeficijenta protoka parničnih, vanparničnih, izvršnih prekršajnih predmeta	I-IV	Predsjednica Suda, predsjednici sudskih odjeljenja, sudije i stručni saradnici kojima se, na osnovu Odluke predsjednice Suda predmeti automatski dodjeljuju u rad u CMS-u .	
1.1.4.	Praćenje realizacije Plana rješavanja predmeta	I-IV	Predsjednica Suda, predsjednica građanskog odjeljenja, sudije i stručni saradnici	

Strateški cilj 1		Unapređenje efikasnosti rada Suda		
Trogodišnji cilj 1.2.		Redovna edukacija predsjednice Suda, sudija i stručnih saradnika iz parnične, vanparnične, izvršne, krivične i prekršajne oblasti, kao i drugim relevantnim temama Edukacija sudskih izvršilaca		
Pokazatelji za izlazne rezultate		Očekivani rezultati po godinama		
		2022 (n)	2023 (n+1)	2024 (n+2)
Broj obuka na koje su predsjednica Suda, sudije, stručni saradnici, sudski izvršioci, sekretar Suda i pripravnici-volonteri bili prijavljeni		46	48	50
Stepen realizacije obuka na koje su predsjednica Suda, sudije, stručni saradnici, sudski izvršioci, sekretar Suda i pripravnici-volonteri bili prijavljeni		100%	100%	100%
Redni broj	Naziv aktivnosti za 2022. godinu	Rok izvršenja (po kvartalima u 2022. godini)	Nosilac (najmanji organizacioni dio)	
1.2.1.	Izrada plana obuke Na osnovu Programa	I	Odjeljenje sudske uprave	

	početne obuke i programa stručnog usavršavanja za 2022. godinu		
1.2.2.	Dostavljanje prijavnih obrazaca za predsjednicu Suda, sudije, stručne saradnike, sudske izvršioci, sekretara suda i pripravnike-volontere Centru za edukaciju sudija i tužilaca u FBiH	I	Predsjednica suda
1.2.3.	Pohađanje obuke	I-IV	Predsjednica Suda, sudije, stručni saradnici, sudski izvršioci, sekretar Suda i pripravnici-volonteri

Strateški cilj 1		Unapređenje efikasnosti rada Suda		
Trogodišnji cilj 1.3.		Osigurati adekvatan prostor za rad Suda		
Pokazatelji za izlazne rezultate		Očekivani rezultati po godinama		
		2022 (n)	2023 (n+1)	2024 (n+2)
Pribavljanje potrebnih finansijskih sredstava.		350.000,00 KM	300.000,00 KM	300.000,00 KM
Broj pribavljenih potrebnih dozvola za rekonstrukciju zgrade Suda		1	1	1
Redni broj	Naziv aktivnosti za 2022. godinu	Rok izvršenja (po kvartalima u 2022. godini)	Nosilac (najmanji organizacioni dio)	
1.3.1.	Planiranje potrebnih finansijskih sredstava-prijedlog Budžeta	I	Predsjednica i sekretar Suda	
1.3.2.	Sastanak sa predstavnicima Ministarstva pravosuđa, uprave i lokalne samouprave HNK-a i predstavnicima Sekretarijata VSTV-a BiH	II	Predsjednica i sekretar Suda	
1.3.3	Izrada potrebne projektna dokumentacije i pribavljanje potrebnih saglasnosti, urbanističke i građevinske dozvole	I-IV	Odjeljenje sudske uprave	

Strateški cilj 1		Unapređenje efikasnosti rada Suda		
Trogodišnji cilj 1.4.		Reorganizacija poslovnih procesa u Sudu		
Pokazatelji za izlazne rezultate		Očekivani rezultati po godinama		
		2022 (n)	2023 (n+1)	2024 (n+2)
Broj uposlenih volontera/		6	7	8

pripravnika u Sudu			
Broj formiranih timova u sudu		6	7
Redni broj	Naziv aktivnosti za 2022. godinu	Rok izvršenja (po kvartalima u 2022. godini)	Nosilac (najmanji organizacioni dio)
1.4.1.	Delegiranje zadataka pripravicima sa liste zadataka, rad na delegiranim zadacima, koordinacija u timu i između timova,	I	Predsjednica Suda, sudije, pripravnici i asistenti sudija
1.4.2.	Izrada Plana rotacije pripravnika	II	Predsjednica Suda
1.4.3.	Nastavak na delegiranju zadataka	III-IV	sudije
1.4.4.	Izmjena Pravilnika o unutrašnjoj organizaciji i sistematizaciji radnih mjesta - povećanje broja sudskih pripravnika/volontera	IV	Predsjednica suda, uz saglasnost Ministarstva pravosuđa uprave i lokalne samouprave HNK-a

Strateški cilj 2		Unapređenje transparentnosti rada Suda		
Trogorodišnji cilj 3.1.		Jačanje raznih kanala komunikacije		
Pokazatelji za izlazne rezultate		Očekivani rezultati po godinama		
		2022 (n)	2023 (n+1)	2024 (n+2)
Broj novih kanala komunikacije		1	1	1
Broj objavljenih vijesti na web stranici Suda i na društvenim mrežama . Unaprijeđena komunikacija Suda sa javnošću i medijima.		10	20	30
Redni broj	Naziv aktivnosti za 2022. godinu	Rok izvršenja (po kvartalima u 2022. godini)	Nosilac (najmanji organizacioni dio)	
3.1.1.	Uspostava novih kanala komunikacije	IV	Odjeljenje sudske uprave, web uredništvo Suda	
3.1.2	Objava aktuelnih informacija i vijesti na web stranici Suda i na društvenim mrežama	I-IV	Web uredništvo Suda, web administrator	

Strateški cilj 2		Unapređenje transparentnosti rada Suda		
Trogodišnji cilj 2.2.		Unaprijediti način objave i količinu objavljenog sadržaja na web stranici Suda		
Pokazatelji za izlazne rezultate		Očekivani rezultati po godinama		
		2022 (n)	2023 (n+1)	2024 (n+2)
Broj izdatih biltena i publikacija		2	3	4
Redni broj	Naziv aktivnosti za 2022. godinu	Rok izvršenja (po kvartalima u 2022. godini)	Nosilac (najmanji organizacioni dio)	
2.2.1.	Održavanje i ažuriranje sadržaja i vizuelnog identiteta web stranice Suda	I-IV	Web uredništvo Suda	
2.2.2	Prikupljanje , provjera, obrada i objavljivanje sadržaja web stranice	I-IV	Web uredništvo. odjeljenja Suda, nosioci pravosudnih funkcija	
2.2.3.	Prikupljanje statističkih podataka o korištenju web stranice Suda	I-IV	Web administrator	
2.2.3.	Izrada biltena i publikacija	IV	Odjeljenje sudske uprave, web uredništvo Suda	

D.Godišnji plan rješavanja sudskih predmeta

Plan rješavanja predmeta u sudovima se svake godine izrađuje u skladu sa važećim Uputstvom za izradu planova rješavanja predmeta usvojenog od strane VSTV-a BiH.

Broj:56 0 Su 072255 22 Dp
Konjic, 14.03.2022.godine

Predsjednica suda
Almina Čilić